

SKUPŠTINA R BiH

Proglašen Ustavni zakon

BiH zadržava kontinuitet postojećeg i ustava predviđenog mirovnim sporazumom • Polemika oko nadležnosti

Poslanici Skupštine RBiH proglasili su na jučerašnjoj sjednici Ustavni zakon o izmjenama i dopunama Ustava Republike Bosne i Hercegovine. Ovim izmjenama treba da se ostvari kontinuitet između postojećeg i ustava BiH predviđenog mirovnim sporazumom.

Polemika rasprava je vođena o odredbi ovog zakona po kojoj RBiH može u slučaju neprovođenja, mirovni sporazum proglasiti nevažećim i nastaviti da djeluje po Ustavu RBiH. Sejfidin Tokić je predložio amandman po kojem bi se precizirali rokovi provođenja sporazuma u čemu ga je podržao i Stjepan Kljuić član Predsjedništva RBiH. Suprotna mišljenja imali su premijer Haris Silajdžić, Avdo Čampara, Rasema Cero, Ekrem Ajanović, Mirsad Čeman i Mevludin Sejmenović koji smatraju da se novi Ustav BiH ne treba vezati za dejtonske rokove, jer postojeće formulacije ostavljaju dovoljno mogućnosti za reagovanje u slučaju opstruiranja. Nakon polusatne rasprave amandman nije prihvaćen, a usvojen je predloženi tekst prijedloga Ustavnog zakona.

Nacrt zakona o izmjenama i dopunama Zakona o Vladi RBiH ponudio je dvije varijante o ustroj-

stvu nove republičke vlade. Prema prvom činili bi je predsjednik, dva zamjenika, šest ministara i isto toliko zamjenika kao i tri ministra bez portfelja. Prema drugom, vlada bi imala predsjednika i tri ministra sa zamjenicima. Većinom glasova poslanici su se opredijelili za prvu varijantu i prihvatili nacrt u cjelini.

Uz sugestiju dr Abdulaha Konjicije da se dá posebna važnost Ministarstvu za izbjeglice i iseljništvo i prijedlog Envera Krese da se formira odgovarajuće tijelo koje će brinuti o međunarodnoj saradnji u oblasti sporta, nacrt zakona o republičkim ministarstvima i drugim tijelima republičke uprave prihvaćen je većinom glasova.

Jednoglasnim odlukama poslanici su juče prihvatili i prijedlog o članstvu RBiH u Međunarodnom monetarnom fondu i drugim međunarodnim finansijskim organizacijama, prijedlog zakona o zaduživanju kod MMF i prijedlog o izmjenama zakona o grančnim prelazima.

Prije razmatranja prijedloga ustavnog zakona poslanici su stupili u polemiku čiji je povod bilo preklapanje nadležnosti Predsjedništva i Skupštine u donošenju uredbi sa zakonskom snagom.


Predsjednik Liberalne stranke Rasim Kadić imao je primjedbu što je na jučerašnjoj sjednici Predsjedništva usvojena uredba sa zakonskom snagom koja regulira plate pripadnicima oružanih snaga, uz konstataciju da takve zakone može da donosi samo Skupština. On je podsjetio da Predsjedništvo uredbu može donositi samo ako republički parlament nije u mogućnosti da zasjeda, što nije slučaj ovaj put.

Sa Kadićevom primjedbom složio se i poslanik Mirko Prskalo, koji je takvo ponašanje Predsjedništva nazvao "omalovažavanjem zastupnika i ovog visokog doma". U raspravu su se uključili predsjednik Republičke skupštine Miro Lazović i generalni sekretar Avdo Čampara, pojašnjavajući da se radilo o urgentnoj zakonskoj odredbi koja je već duže u proceduri. Član Predsjedništva RBiH Ivo Kornšić je pak tvrdio da je prisustvovao sjednici Predsjedništva i donošenju zakona ali da nije znao da isti dan zasjeda republički parlament.

Poslanik Kadić nije bio zadovoljan odgovorom izrazivši svoje nezadovoljstvo prijedlogom da "Skupština odsad samo plješe na već donesene zakone".

S.KASALO

JUČE U PREDSDJEDNIŠTVU R BiH



Predaja akreditiva: predsjednik Izetbegović i francuski ambasador Godel
(Snimio: D. Babić)

Iv Godel predao akreditive

SARAJEVO, 12. DECEMBRA (BHPRESS) - Novi francuski ambasador u RBiH Iv Godel (Ives Gaudeul) predao je akreditive predsjedniku Predsjedništva RBiH Aliji Izetbegoviću. "Francuska je svojim učešćem pokazala simpatije prema Vašem narodu i mi se nadamo da će u Parizu biti potpisan dejtonski sporazum. Izbori koji slijede bit će još je-

dan dokaz da se demokracija vraća u vašu zemlju", istakao je novi francuski ambasador u RBiH Iv Godel.

Predsjednik Predsjedništva RBiH Alija Izetbegović izrazio je zahvalnost francuskom narodu, vladi i predsjedniku Republike Francuske na datoj podršci u pravедnoj borbi bh. naroda za uspostavu demokracije.

DELEGACIJA SGV U BRISELU

Sporazum ranjiv, ali ostvariv

(Specijalno za "Oslobodenje")

BRISEL, 12. DECEMBRA - Na evropskoj turneji, upriličenoj nakon svečanog preuzimanja alternativne Nobelove nagrade za mir, delegacija SGV BiH zaustavila se u ponedjeljak i utorak u Briselu.

Nakon gotovo četvorosatnog "rešetanja" u Komisiji Evropske unije, gdje je najviše govoreno o ekonomskim pretpostavkama za mir, član Predsjedništva BiH i predsjednik SGV dr Mirko Pejanović, te potpredsjednik ovog političkog pokreta sarajevski odvjetnik Žarko Bulić bili su gosti belgijskog Senata. Radoznalim parlamentaracima nije izmakao bukvalno nijedan segment aktuelnih događanja u BiH, ali top-teme bile su ipak refleksije dejtonskog sporazuma, stvarno i lažno stanje duha bosanskih Srba, odnos srpske populacije prema ratnim zločinima, budućnost Radovana Karadžića, te šanse za istinsku demokratiju u BiH.

Govoreći o dejtonskom sporazumu, Pejanović je rekao da SGV o tom dokumentu ima pozitivan stav,

"bez obzira na njegovu ranjivost u pojedinim segmentima". Prema Pejanoviću, najveća vrijednost sporazuma je u tome što je zaustavio ubijanja, progone, etničko čišćenje i patnje stanovništva, te što predstavlja solidnu osnovu za postizanje konačnog mira. Do konačnog cilja moguće je stići, smatra Pejanović, samo ako budu podjednako odgovorno i sinhrono djelovale sve unutrašnje kohezivne snage i ako međunarodna zajednica ostane dosljedna u namećanju mirovnih rješenja.

Na više pitanja u vezi s ratnim zločinima, Pejanović je odgovorio da je to "temeljni uslov za uspostavu mira i vraćanje povjerenja".

Potpredsjednik SGV Žarko Bulić, najviše je govorio o ljudskim pravima, građanskim slobodama, predstojećim izborima...

On smatra da je "restitucija u ratu narušenih ljudskih prava jedno od najvažnijih pitanja za mir. Bez uspostave najmanje 60 postotne predratne demografske slike BiH nema mira, a imaćemo stalno generisanje međunarodnih sukoba".

Z. S.

OIK

Program za BiH

KONAKRI, 12. DECEMBRA (AFP) - Dva dana prije potpisivanja dejtonskog sporazuma o Bosni, Organizacija islamske konferencije (OIC) danas je usvojila program rada za Bosnu i Hercegovinu. Ministri vanjskih poslova 23 zemlje članice OIC u svom saopćenju izrazile su podršku potpunom provođenju dejtonskog sporazuma kojim se osigurava suverenitet i integritet BiH.

Prema saopćenju OIC, Bosna će od ove organizacije primati "značajne vojne doprinose i finansijske resurse" kako bi se pomogao razviti odbrambene industrije BiH i kako bi ova zemlja "u budućnosti mogla odbiti svaki vojni atak".

Zatim, OIC će pružati pravnu podršku, a koja se odnosi na "sudjenje ratnim zločincima", te osiguravanje da bogatstva bivše Jugoslavije "i dalje ostanu zamrznuta sve do postizanja konačnog sporazuma o granicama republika bivše Jugoslavije."



Odžak

Srbi napuštaju Odžak

ODŽAK, 12. DECEMBRA (BH PRESS/REUTER) - Nakon što je dejtonskim sporazumom odlučeno da posavski gradić Odžak pripadne Federaciji BiH, Srbi koji sada žive u tom gradu odlučili su se na masovnu selidbu. Oko 20.000 ljudi, koliko ih sada živi u Odžaku, od kojih je

12.000 izbjeglica, počeli su da pakuju svoju imovinu i pripremaju se na odlazak.

Zaprežna kola koja vuku konji i traktori pretrpana su svim što se može ponijeti, uključujući namještaj, slavine za vodu, pa čak i prozorske okvire.

MEDALJA ZA LJUDSKA PRAVA

"La benevolenciji" i Košniku

SARAJEVO, 12. DECEMBRA (BH PRESS) - Međunarodna liga za ljudska prava u Berlinu jučer je Jevrejskom kulturno-prosvjetnom i humanitarnom društvu "La benevolencija" uručila medalju za ljudska prava Karl von Osjecki. U ime "La benevolencije" nagradu je primio predsjednik ovog društva Jakob Finci. Ova nagrada se uručuje već više od 30 godina i nosi ime po Karlu von Osjeckom, poznatom antifašisti i borcu za ljudska prava.

Međunarodna liga za ljudska prava odlučila je da ove godine medalju uruči "La benevolenciji", kao priznanje za rad ovog humanitarnog društva tokom četiri ratne godine u BiH. Posebno naglašavajući da je "La benevolencija" pružala pomoć svima bez obzira na vjeroispovijest, nacionalnu pripadnost i pol.

Istu nagradu primio je ove godine i administrator Evropske unije u Mostaru Hans Košnik.

Osim ove medalje, "La benevolencija" je dobila i drugo međunarodno priznanje koje će biti uručeno 15. decembra u Hagu. Radi se o međunarodnoj nagradi za mir.

BRAUNOVO PISMO OMIČEVIĆU I TOMIĆU

Profesionalno gostoprimstvo

SARAJEVO, 12. DECEMBRA (BH PRESS) - Nakon gotovo jednomjesečnog rada u Republici BiH, šef misije Međunarodnog monetarnog fonda za RBiH Scot Braun (Brown) je odmah nakon odlaska iz Sarajeva uputio guverneru Narodne banke BiH Kasimu Omičeviću i ministru finansija Nevenu Tomiću pismo u kojem zahvaljuje na ljubaznosti i profesionalnom gostoprimstvu koje je iskazano

prema njemu lično i prema njegovim kolegama.

On je istakao da je spremnost za saradnju bila ključ napretka postignutog u osnivanju novih institucija i reintegracije RBiH u međunarodnu zajednicu. Braun je takode obavjestio Omičevića i Tomića da je iz vještaj o svom radu i nacrt izjave c ekonomskoj politici za 1996. zvanično dostavio Izvršnom odboru Međunarodnog monetarnog fonda.